

# Radononza generala dalla Pleiv catolica romana Trun

---

## Protocol dils 10 d'avrel 2019 allas 20.00 uras en l'aula dalla scola Trun

### 1. Beinvegni, approvaziun dalla gliesta da tractandas, elecziuns dumbravuschs

Il president fa in cordial beinvegni a tuts presents (total 48). In special beinvegni fa el a nies plevon sur Tomasz ed al president communal Dumeni Tomaschett.

Perstgisas: Benedetg Albin, Albert e Mariuschla Decurtins, Esther Tomaschett, Giusepina Bundi.

La gliesta da tractandas ei stada publicada duas gadas el fegl official, l'emprema ga ils 29-03, pia pli ch'il termin da 10 dis tenor art. 16 da nossa costituziun. La radunonza ei pia convocada legalmein e la gliesta da tractandas aschia approvada.

Las tractandas 2-6 e 8 cun tuttas informaziuns necessarias ein stadas piazzadas odem las baselgias da Schlans, Trun e Zignau.

Suenter la publicaziun dalla gliesta da tractandas ei vegniu ina damonda da purificar il dretg sin la parcella 2086 a Gravas. La suprasonza propona d'amplificar la gliesta ella tractanda 11 cun: Fundaziun Baselgia sogn Martin, parcella 2086 a Gravas.

**La gliesta da tractandas vegn approvada unanimamein sco prelegida.**

**Sco dumbravuschs vegnan Lea Alig-Flury e Giusep Defuns elegi unanimamein.**

### 2. Protocol dalla radunonza generala extraordinaria dils 21 da november 2018

Il protocol dalla radunonza generala extraordinaria dils 21 da november 2018 vegn approbaus unanimamein. Cordial engraziament alla actuara Olivia Pfister-Tgetgel.

### 3. Rapports

#### a) President

Il president menziunescha in pèr puncts essenzials ord siu rapport e gratulescha a sur Tomasz per l'elecziun sco decan. Il rapport cumplet ei annexaus a quest protocol. Cun in Babnos essan nus seregurdai dils defuncts. Possien els ruassar en pasch.

#### b) Administratur dils beins

Igl administratur dils beins, Benedetg Albin, ei muort in'operaziun maldispots. Il president orientescha cuortamein sur da differentas caussas. Il rapport cumplet ei annexaus a quest protocol.

#### **4. Rendaquen per 2018**

##### **a) Rapport dil cassier**

Il cassier, Alois Tomaschett, presenta il quen dalla pleiv che siara cun entradas da frs. 336'301.22 ed expensas da frs. 328'202.85 che muntan in gudogn da frs. 8'098.37. La facultad dalla pleiv pils 31.12.2018 munta frs. 624'401.53. Il quen en detagl ei annexaus al protocol.

##### **b) Rapport dils revisurs**

En num dils revisurs conferma Gion Friberg

- ch'ils mussaments d'entradas ed expensas ein avon maun
- ch'ils contos da bilanza e dil quen da menaschi corrispundan allas cudischaziuns
- che la facultad corrispunda alla bilanza dils 31-12-2018.
- che la contabilitad ei menada a moda exemplarica

##### **c) Approbaziun dil quen e conclus da scarica**

Sin fundament dil rapport da revisiun propona il revisur d'approbar il quen digl onn 2018 cun dar scarica alla suprastonza.

**La radunonza approbescha unanimamein il quen 2018 e dat scarica alla suprastonza.**

#### **5. Rendaquen dallas fundaziuns per 2018**

##### **a) Rapport dil plevon**

Sur Tomasz dat rapport sur dil quen dallas capluttas e messas fundadas. Il cassier Alois dat rapport dalla facultad dils fondos ecclesiastics.

##### **b) Rapport da gestiun**

Il revisur Gion Friberg propona d'approbar il quen.

**La radunonza approbescha unanimamein il quen 2018 dallas fundaziuns.**

Il president engrazia als funcziunaris dallas differentas fundaziuns pigl engaschi e la buna lavur.

#### **6. Preventiv 2020**

Il cassier Alois Tomaschett presenta il preventiv per 2020 cun entradas da frs. 319'300.00 ed expensas da frs. 318'500.00 che preveda in gudogn da frs. 800.00. Il preventiv 2020 ei annexaus al protocol.

**La radunonza approbescha unanimamein il preventiv 2020.**

#### **7. Fixaziun dil pei da taglia per 2020**

La suprastonza propona da schar il pei da taglia sin 15% dalla taglia sempla sco entochen dacheu.

**La radonunza decida unanimamein da schar il pei da taglia per 2020 sco tochen dacheu sin 15% dalla taglia sempla dil cantun Grischun.**

## **8. Rapport dalla presidenta dil cussegl pastoral**

La presidenta dil cussegl pastoral, Cristina Derungs, dat in rapport detagliau sur dil curriu e passau. Il rapport ei annexaus a quest protocol.

Il president engrazia ad ella ed a sia squadra per la buna lavur prestada.

## **9. Elecziuns**

### **a) president**

President Serafin seretila da sia incarica sco president dalla pleiv Trun suenter haver surpriu 2006 il presidi dalla caplania Zignau ed in onn suenter vidlunder il presidi dalla pleiv da Trun. 2013 han las pleivs da Trun e Schlans sco era la caplania da Zignau elegiu mo ina suprastonza comunabla per deliberar tuttas fatschentas da lur instituziuns. 2015 ei vegniu instradau las preparativas per la fusiun dallas treis pleivs. Nus engraziein grondamein e da cor a Serafin per sia nunstunchenteivla lavur ed engaschi a favur dalla pleiv e giavischein ad el tut bien pil futur e buna sanadad, Dieus paghi.

Alla suprastonza ei reussiu dad anflar in successur. A disposiziun per il presidi dalla pleiv stat Pieder Decurtins, in um engaschau en nossa pleiv. Pieder drezza cuortamein zaconts plaids als presents.

Ei ha neginas autras porpostas pil post da president.

**Pieder Decurtins vegn elegius sco president dalla pleiv Trun cun in grond applaus.**

President communal Dumeni Tomaschett engrazia a Serafin per la lavur prestada e la buna collaboraziun cun la vischnaunca. El gratulescha a Pieder e giavischa bien success.

### **b) cassier**

Alois Tomaschett resta vinavon cassier, grond engraziament.

### **c) administratur dils beins**

Benedetg Albin resta vinavon administratur, grond engraziament

### **d) dus commembers dil post da revisiun**

Gion Friberg resta vinavon revisur, grond engraziament.

Erna Nay ha abdicau sco revisura.

La suprastonza propona d'eleger Lea Alig-Flury sco revisura.

**Lea Alig-Flury vegn elegida sco revisura.**

### **e) quater commembers dil cussegl pastoral**

Suandontas personas vegnan elegidas sco commembers dil cussegl pastoral:

**per Zignau: Claudia Küttel**

**per Schlans: Toni Pfister**

**per Trun: Manuela Wolf-Tomaschett e Giusep Defuns**

## 10. Fundaziun Pervenda Schlans:

### **Tschessar 248 m<sup>2</sup> terren, parcella 6072, al cantun per slargiar la via da Schlans**

Il president Serafin Rensch orientescha sur dalla damonda digl uffeci cantunal da construcziun bassa per tschessar 248 m<sup>2</sup> terren agricol dalla parcella 6072 en connex cun il slargiar la via da colligaziun denter Trun e Schlans.

Cun la brev dils 05 da mars 2019 ha il vicari general, sur dr. Martin Grichting, dau il consentiment da conceder alla damonda dil cantun Grischun.

Il contract d'aquist ei vegnius elaboraus dil cantun.

Il contract da vendita denter il cantun e la Fundaziun Pervenda Schlans vegn prelegius.

Votaziun per tschessar il terren giavischau:

Total presents: 48 personas

**Gie:** 48 vuschs

**Na:** 0 vuschs

**Abstenziuns dalla vusch:** 0 vuschs

**Conclus:**

***La radunonza generala conzeda, cun consentiment digl Ordinariat episcopal, al cantun Grischun la damonda d'aquistar 248 m<sup>2</sup> terren dalla parcella 6072 per slargiar la via cantunala en possess dalla Fundaziun Pervenda Schlans.***

## 11. Fundaziun Pervenda sogn Martin Trun:

**parcella 1980 Foppa a Campliun, parcellas 4091 e 5085 cuolm Bugliadera, parcella 2086 a Gravas**

**- decisiun pertuccont purificaziun dretgs persunals en connex cun l'introducziun dil register funsil federal en vischnaunca Trun**

Il president Serafin Rensch orientescha che la vischnaunca ha giu publicau el FUS ch'ei vegni introduciu il register funsil federal sil territori restont dalla vischnaunca. Sebasond sin art. 10 dall'ordinaziun dil register funsil dil cantun Grischun ein dretgs aunc buca impurtai el register funsil cantunal da far valer. Per far valer nos dretgs d'intress persunals ni reals basegna ei in „Grunddienstbarkeitsvertrag“ mintgamai denter las partidas pertuccadas neccessaris.

Cun las brevs dils 21 da mars e dils 5 d'avrel 2019 ha il vicari general, sur dr. Martin Grichting, dau il consentiment d'impurtar ils contracts el register federal dil cudisch funsil.

Ils contracts ein vegni elaborai dil menader dil cudisch funsil.

### **a) Parcella 1980 Foppa a Campliun**

Pertucca parcella 1968 frars Alois e Constatin Tambornino / parcella 1978 Martina Decurtins, Andrea Brunner, Rita Defuns, Carlina Albrecht / parcella 1979 Eva Decurtins / parcella 2488 Giachen Albrecht.

Il contract vegn prelegius ed approbaus sco suonda:

**Gie: 46 Na : 2**

**b) Parcelas 4091 e 5085 Cuolm a Bugliadera**

Pertucca traversar la parcella dil cuolm dad Arthur Decurtins e sia feglia Edith Oechslin.

Il contract vegn prelegius ed approbaus sco suonda:

**Gie: 46 Na : 0 Abstenziuns: 2**

**c) Parcella 2086 a Gravas**

Pertucca dar in dretg da traversar per las parcelas 2087 e 2540 da Blandina Quinter atras la parcella 2086 en possess dalla Fundaziun Baselgia s. Martin. Blandina Quinter banduna la radunonza.

Il contract vegn prelegius ed approbaus sco suonda:

**Gie: 47 Na: 0**

**Conclus:**

***La radunonza generala ordinaria approbescha, cun consentiment digl Ordinariat episcopal, ils contracts da servitut per las parcelas nrs. 1980, 4091, 5085 e 2086 en possess dalla Fundaziun Pervenda sogn Martin Trun.***

**12. Varia****Orientaziuns****Lavar ora las baselgias:**

- Trun, mesjamna ils 22 da matg allas 13.30
- Zignau, mesjamna ils 29 da matg avonmiezdi
- Schlans, mo mintga dus onns, 2019 croda
- Nossadunna, mesjamna ils 28 d'uost suentermiezdi

**Perdanonzas Zignau e Schlans:** La musica ha brattau cun il chor cecilian da sunar a Schlans e buca a Zignau, motiv fiasta da musica cantunala ad Arosa. Sunar alla perdanonza a Schlans vegn pli probabel tuttina buc ad esser pusseivel, motiv nozzas d'in commember.

Sco reconuschientscha per la lavur prestada surdein in matg flurs per Erna Nay.

Olivia, Sur Tomasz ed era Cristina engrazian grondamein a Serafin per la buna collaboraziun e la lavur prestada en favur dalla pleiv. Sco reconuschientscha surdein in present.

Sur Tomasz drezza zaconts plaid als parochians ed engrazia per il sustegn.

Olivia presenta la pagina d'internet **[www.pleivtrun.ch](http://www.pleivtrun.ch)**

Daniel Tuor engrazia a Serafin per la lavur prestada ed a sur Tomasz per surprender la pastoraziun en Casa sogn Martin. Luregn Mattias Pfister engrazia a Serafin.

Serafin engrazia a tuts presents ed alla vischnaunca per far diever dall'aula ed al pedel Lotar.

Trun, ils 10 d'avrel 2019

L'actuara: Olivia Pfister-Tgetgel

Visau dil president: Serafin Rensch